



UNIVERSITÄTS-
BIBLIOTHEK
PADERBORN

Universitätsbibliothek Paderborn

Mater Amoris Et Doloris

Ginther, Anton

Augustæ Vindelicorum, 1711

VD18 15312348

Consideratio IV. Dolorosa Virgo in aurora, & juxta piscinam probaticam (futuræ Passionis typum) in lucem nascitur. Emblema. Aurora diem orbi prænuntians, & terram rore suo fæcundans cum inscripto ...

[urn:nbn:de:hbz:466:1-47286](https://nbn-resolving.org/urn:nbn:de:hbz:466:1-47286)

CONSIDERATIO IV.

Dolorosa Virgo in aurora, & juxta piscinam probaticam (futuræ passionis typum) in lucem nascitur.



Aurora ab lacrymis.

*Qua est ista, qua progreditur quasi aurora con-
surgens? Cant. 6. 9.*

MUltis, variisque plagis contumacem quondam ac rebellem Ægyptum flagellavit DEUS justus scelerum & sceleratorum vindex, inter quas plagas non minima fuit caliginosa illa nox, ac densissimæ tenebræ, quibus universa Tellus Niliaca per triduum affligebatur: *Extenditque Moyses manum suam in cœlum, & factæ sunt tenebræ horribiles in universa terra Ægypti tribus diebus; nemo vidit fratrem suum, nec movit se de loco, ubi erat &c.* Exod. 10. 22.

Mater Dolorosa.

E

Ad-

Adverte : talis rerum facies , mundique status extitit , antequam VERBUM incarnaretur , ubique tunc erant tenebræ peccatorum , & servitus idolorum , ac ignorantie legum tenebant populos : *Et tenebræ erant super faciem abyssi* ; tunc verificabatur illud Osee Prophetæ : *Maledictum est mendacium , & homicidium & furtum & adulterium inundaverunt , & sanguis sanguinem tetigit &c.* Tunc nulli in cælo adhuc erant Beati , nulli in mundo Justii , vel admodum pauci , sed omnes se-
debant in tenebris & in umbra mortis , quia cor eorum non erat rectum cum DEO , nec fideles habitii sunt in testamento ejus.

Sed DEO. T. O. M. sint laudes infinitæ , ubi post hanc longam & caliginosam noctem (hoc est post quatuor millia annorum à creatione mundi) tandem illuxit B. Virginis MARIÆ ortus , tunc mundo immundo prima lux & optata cæli aurora oriri visa est , quæ Solem justitiæ , qui est Christus DEUS , brevi venturum , & per Sanguinem suum in cruce mundum deperditum redempturum prænuntiaret ; in quem finem pro Symbolo nostro auroram roxantem (quia aurora à rore nomen habet) statuimus cum lemmate :

Aurora ab lacrymis.

Lacrymæ enim SS. Parentum & SS. Patrum hanc SS. Deiparam impetrârunt.

B. Pet. Dam.
 Serm. de Assumpt.
 S. Damasc. 4.
 de fide. c. 15.

2. Nata est autem hæc SS. Deipara sub tempus primæ auroræ juxta Piscinam Probaticam in Jerusalem , quæ tunc à SS. Parentibus nomen accepit MARIA ; singula innuunt aliquid , attentum te esse cupio. Cùm quondam gens Hebræorum ob crudele edictum impij Amani jam jam ad necem & interitum venundata mærore & angore penè conficeretur , & quasi semimortua supremam laniæ suæ diem expectaret ; ecce subito illi in hac caliginosa nocte nova lux & fida dux in medijs tribulationum tenebris affulsit , dum DEUS cor Esther Reginæ commovit , ut ad Assuerum , potentissimum Persarum Regem ingrederetur , à quo non duntaxat veniam suæ genti obtinuit , sed & ut litteræ omnes de mactandis Judæis in Susam & alijs in locis revocarentur ; ad quod
 Scriptura subjungit : *Judæis autem nova lux oriri visa est , gaudium , honor & tripudium apud omnes populos , urbes atque provincias.*

Mittamus umbras ; an non universum genus humanum miserri-
 mè in tenebris peccatorum per tot sæcula oberrans , jam jam ad mortem æternam erat à Divina Nemese destinatum ? litteræ , quibus ad sempiternæ

ternæ damnationis barathrum à Divino Consistorio erat condemnatum, jam erant exaratae, & vivâ voce per Prophetas publicatae: *Anima, quæ Ezech. 18. 4. peccaverit, ipsa morietur* &c. Et quis tum temporum intervallo non erat in peccatis? Vatem Jessæum consule: *Omnes declinaverunt, simul Psal. 13. 3. inutiles facti sunt: non est, qui faciat bonum, non est usque ad unum*; quid ergo in re tantoperè desperata consilij? O miram pientissimi Numinis clementiam! Nascitur tandem sub sideris antelucani & auroræ tempus die 8. Septembris tot SS. Patrum & piarum mentium votis summè exoptata Virgo, ac tanto orbis Redemptore digna Mater, quæ Solem Justitiæ præcurrens, cælo & mundo gaudium annuntiavit universo; ubi adimplerum fuit, quod de Regina Esther quondam prædicatum est: *Nova Esth. 8. 16. lux oriri visa est, gaudium & honor & tripudium apud omnes populos, urbes atque provincias.*

3. Hanc sacratissimæ Deiparentis natalem prævidit Elias Prophe- *Jo. Ep. Hie-*
tarum zelosissimus sub umbra illius nubeculæ super mare Mediterraneū *rosol. de In-*
post tam diurnam terræ siccitatem exurgentis: *Ecce nubecula parva, fit. Mon.*
quasi vestigium hominis ascendebat de mari. Hanc diem revelavit DEUS *3. Reg. 18.*
servo suo Abrahamo: *Abraham pater vester exultavit, ut videret diem 44.*
menm: vidit, & gavisus est. Eandem David Israëlitarum Rex sub typo *Jo. 8. 16.*
Arcæ fœderis agnovit; proin totis viribus, & insolito gaudio perfusus *2. Reg. 6. 14.*
coram eadem arca saltavit: *Et David saltavit totis viribus ante Domi-*
num; supra quod S. Ambrosius: *David elatus gaudio in salutationem pro-*
rumpit, providebat enim in spiritu MARIAM de germino suo nascituram. *S. Ambr. Serm. 80.*
Hanc & cœlestes illi Spiritus sub typo nascentis auroræ prævidebant, un-
de admirabundi occlamabant: *Quæ est ista, quæ progreditur quasi aurora Cant. 6. 9.*
conspurgens? supra quod pereleganter Rupertus Abbas: *Quando nata es,*
inquit, *ô Beata Virgo, tunc vera nobis aurora surrexit, aurora prænnuntia Rup. Abb.*
diei sempiternæ; quia sicut aurora quotidiana finis præterite noctis est, & in hunc loc.
initium diei sequentis, sic nativitas tua, nativitas ex semine Abrahamæ, clara Cant.
ex stirpe David, ad quos cum juramento DEI facta est repromissio benedictio-
nis, finis dolorum, & consolationis fuit initium, finis tristitiæ, & latitia no-
bis extitit principium.

4. O mortales omnes gaudete; hac die nata est fortis illa Mu-
lier, quæ venenosum callidi serpentis caput conteret: *Ipsa conteret Gen. 3. 15.*
caput tuum. Hac die vinea illa uberrima ex Anna pullulavit, quæ u-
vam proferet suavissimam, botrumque illum Cypri dulcissimum, pro
mundi salute in torculari crucis calcandum. Hac die plantatus est il-
le

le hortus paradisi, in quo collocandus erat novus & innocentissimus Adam Secundus: *Plantaverat autem Dominus DEUS paradysum voluptatis à principio, in quo posuit hominem, quem formaverat.* Supra quod Sanctus Proclus: *Hac est secundi Adami paradysus; & Mellissus: Hortus planè deliciarum MARIA est.* Hac die præparatus erat pretiosissimus ille lectulus, quem sexaginta ex fortissimis ambiebant, in quo pacificus ille Salomon, imò qui plus est, quàm Salomon, Christus JESUS, Dominus ac DEUS noster per novem mensium spatium quiesceret: *En lectulum Salomonis.* Hac die parata est illa fiscella scirpea, in qua Myfticus ille Moyfes aquis tribulationum hujus mundi expositus servaret: *Sumpsit fiscellam scirpeam, & linivit eam bitumine ac pice: posuitque intus infantulum, & exposuit eum in carecto ripe fluminis;* supra quod D. Ambrosius: *Per fiscellam scirpeam Beata Virgo MARIA designata est, Moyfes Christum figurabat &c.* Hac denique die excultus est ille ager benedictionis, ex quo efflorescet granum illud electum, & frumentum E-lectorum in salutem animarum in cruce mortificandum: *Ipse Dominus JESUS, ait S. Augustinus, erat granum mortificandum, & multiplicandum: mortificandum infidelitate Judæorum, multiplicandum fide populorum &c.* O felicissimum natalem Virginis! Pharao Ægyptiorum Rex in veteri testamento, & Herodes in novo diem suum Natalem magna cum festi- vitate celebrasse dicuntur; verùm uterque hanc sui natalitij diei festi- vitatem profusione humani sanguinis cruentavit, dum ille Præpositum pistorum, hic Sanctum Joannem, Domini Præcurso- rem, in carcere obtruncavit; pereant illorum dies natales, qui ad exitium aliorum & ad interitum animarum nati sunt, melius enim erat, si nati non fuissent; sed tua Nativitas ò DEI Genitrix Virgo, gaudium annuntiavit universo mundo: *ex te enim ortus est Sol justitiæ, Christus DEUS noster, qui solvens maledictionem, dedit nobis benedictionem, & confundens mortem, donavit nobis vitam sempiternam.*

Hinc nullatenus dubitandum, quia jam tunc in cunis SS. Angeli hanc designatam Deiparentem, ut Reginam suam, & cœlestium ruina- rum instauratricem peculiari honore venerati sint. Cura & tu Maria- ne Lector, in te excitare grandem hujus SS. DEI Genitricis existima- tionem, eamque pro viribus ama, & cole, dum jam tunc accelerato rationis usu DEUM perfectè agnoscebat, & ardentissimè amabat; imò jam tunc (prout piè observat Venerandus P. Ambrosius Spinola) pro nobis DEUM deprecabatur, atque in illis cunis offerebat lacrymas,

&c

Gen. 2. 8.

S. Proclus in
Gen. 1.

S. Bernh.
Serm. 2. de
Nat.

Cant. 3. 7.

Exod. 2. 3.

S. Ambr. in
c. 6. Apoc.

S. Aug. tract.
51. in Joan.

Gen. 40. 20.

Marc. 6. 21.

Eccles. in Of-
fic.

S. Ambros.
Spinola in
Med. die 11.
Septembr.

& deslebat nostra peccata, dum divinitus edocta Verbum æternum in mundum venturum cognovit, & assumptâ naturâ humanâ, per passionem suam, crucem & mortem genus humanum, peccato perditum, redempturum; quibus considerandis consideratis, prudenti Lectori abundè pater, jam tunc in cunis Sacratissimum cor Virginis doloris gladium pertransiisse. Ah quantum obligati sumus huic SS. Deiparæ! & eheu quantum distat adhuc cor nostrum ab hoc purissimo Corde MARIÆ, quæ concepta & nata est amica DEI, & filia gratiæ, nos autem filij iræ, filij gehennæ, & inimici DEI; ô quantum oportet nos humiliari, si vel istam justâ lance ponderamus nostram miseriam!

5. Progrediamur ulterius. Mirabilis fuit illa lucta, quam quondam Angelus cum Jacobo Patriarcha in patenti campo habuit: *Ecce Vir luctabatur cum eo usque mane*; Tandem Angelus, ubi auroram in vestitu deaurato, roseisque fulgentem capillis in nubibus cœli progredientem, conspicatus est, quasi victus à Jacobo Dimissionem ab eo petijt: *Dimitte me, jam enim ascendit aurora*. Res stupenda: quid est, quod Angelus tam festinum paraverit abicum, cum auroram surgentem vidit?

Gen. 32. 24.

6. Rupertus Abbas, Beatissimam Virginem in nativitate sua rectè ejusmodi auroræ assimilandam, de qua Angeli admirabundi decantabant: *Quæ est ista, quæ progreditur quasi aurora consurgens?* per Angelum verò cum Jacobo per noctem colluctantem, Divinum illum magnique consilij Angelum, Filium DEI subaudimus, & per Jacobum genus humanum. Colluctabantur ergo invicem DEUS & homo per plura sæcula; luctabantur Patriarchæ & Prophetæ, cunctæque piorum animæ ferventissimis precibus ac desiderijs, ut in tenebris peccatorum & in umbra mortis sedentibus tandem lux vera, quæ illuminat omnem hominem, venientem in hunc mundum, id est, Christus DEUS noster illucesceret. Vidit tandem DEI Filius MARIAM, velut mysticam auroram in nativitate sua consurgentem; quid, inquiebat ad Patrem suum æternum, quid moror ulterius in cœlo? ad quid luctor tam diu cum Jacobo, generis humani typo? eja Pater: *Dimitte me, jam enim ascendit aurora*, hæc sola mihi inter omnes placuit: *Descendam igitur, quia vidi afflictionem populi mei, & clamorem ejus audivi; descendam, ut liberem eum per passionem meam, crucem, sanguinem, mortem: hæc mihi socia vitæ, passionis ac redemptionis humanæ erit; jam rutilat cœlum, tempestas erit, & pluvia in cruce sequetur*

Cant. 6. 9.

Jo. 1. 9.

Gen. 32. 24.

Exod. 3. 7.

Matth. 16. 3.

fanguinolenta, per quam mundus immundus non tam abluetur à for-
 dibus, quàm & de novo ad ferendos bonorum operum fructus restau-
 ratur &c. Ex his facile rationem erues, quare pientissima Virgo
 sub auroræ tempus in lucem nata sit: SS. Deipara, ait Azorius, *illu-
 cescente aurora nata est*; adverte: aurora aut serenum aut pluviosum
 indicat diem, si clara & aurea est, candidum, gratumque præfagit
 diem, unde lemma: *Optatam feret illa diem*; si autem roseo specta-
 bilis ore est, nimiumque rubicunda, brevi in pluvias solvetur, hinc
 rursus lemma: *Venturos indicat imbres*, vel brevius & melius: *Ru-
 bicunda procellas*. O pientissima Virgo, utrumque per gloriosam Na-
 tivitatem tuam mundo annuntiasti, dum optatam ei diem tulisti, &
 simul sanguineæ tempestatis in cruce futuræ nuntia & prodroma exti-
 tisti: *Hæc est*, ait B. Petrus Damianus, *aurora, quam sequitur, imò
 de qua nascitur Sol justitiæ &c.*

Azor p. 2. l. 1.
 s. 19. q. 8.

B. Pet. Dam.
 Serm. 40.

6. Collige ex his anima Christiana aliquam pro te doctrinam:
 Aurora, ait B. Albertus Magnus, idem est, quàm *Aurea hora*, vel
Aura rorans, dum non tantum orbi in tenebris sepulto primam lu-
 cem producit, sed & fecundissimo rore languentia terræ germina,
 fata & gramina, flores, hortos & campos mirè refrigerat, atque
 fecundat, unde lemma: *Cœlestis vegetat liquor*. Talis aurora, seu
 aurea hora, vel aura rorans etiam Beatissima Virgo in sua gloriosissi-
 ma nativitate nobis exitit, dum per eam Christus DEUS noster,
 quem SS. Patres per plura sæcula tot ardentibus votis ut descenden-
 tem cœli rorem desiderabant: *Rorate cœli desuper, & nubes pluant
 justum*, ad nos venire dignatus est, qui exinde arida mortalium cor-
 da gratiæ suæ rore mirè refrigeravit, fecundavitque. Roga ô ani-
 me mi, & per dulcissimum COR SS. Matris ejus obsecra amantissi-
 mum Redemptorem, ut pariter cor tuum languidum, aridum ac te-
 pidum divino gratiæ rore dignetur perfundere: *Queramus gratiam*,
 inquit Mellissius, *& per MARIAM queramus, quia quod querit inve-
 nit, & frustrari non potest.*

B. Alb. M.
 l. 7. de laud.
 Deip. c. 7.

Isa. 45. 8.

S. Beruh. in
 Serm. de
 Nat.

Ad conspectum auroræ volucres cœli, quasi de novo redivivæ
 mirè exultare, DEUMque creatorem suum concordibus laudare voci-
 bus solent; econtrâ noxiæ bestię, de nocte ad rapinas & cædes ex-
 currentes, & lucifugæ noctuæ ad ortum illius primæ lucis tremulæ
 aufugiunt, obscurasque in sylvis repetunt larebras, proinde huic au-
 roræ non incongruè iterum pro lemmate inscribes: *Illuminat, & eli-
 minat.*

minat. MARIA recens nata hæc mystica & lucida aurora fuit, dum auream reduxit ætatem, ad cuius ortum mox aves cœli, hoc est, boni Angeli & piæ fidelium mentes mirè jubilabant; e contra noxiæ bestiæ & turpes noctuæ, hoc est, maligni Spiritus, qui priùs orbi dominabantur, ad conspectum hujus Mysticæ auroræ fugati, & in antra sua infernalìa redire coacti sunt? & quemadmodum populus ille Israëliticus ad ortum auroræ, à durissima Ægyptiorum servitute à DEO Exod. 14. 24. liberatus, sicque pede per Mare Rubrum in terram desiderabilem traductus est; impio e contra tyranno Pharaone cum universo exercitu suo in profundo maris submerso; sic per nativitatē B. Virginis, prout canit Ecclesia, *salus mundi credentibus apparuit*, dæmoni verò Jo. Patr. Jerosol. l. de opere Monach. 10. 9. Bibl. P. P. & exercitui ejus exitium ac interitus, dum hac ipsâ die Delphicum illud Apollinis simulacrum, ex quo hæctenus dæmon ad gentiles loquebatur, horrendum edens sonum, in conspectu populi corruiit, & sicut quondam in castris Assyriorum in aurora una *Mulier Hebræa* (Judith. 14. 16. Juditham intellige) *fecit confusionem in domo Nabuchodonosor*; ita una *Mulier Hebræa & Virago MARIA* vix in lucem nata in castris principis tenebrarum & in domo Luciferi maximam causavit confusionem; ô piētissima! quàm meliùs de te dicere possumus, quod olim de Juditha plenis faucibus prædicatum est: *In gloria Jerusalem; tu lætitia Israël, tu honorificentia populi nostri.* Judith. 15. 10.

Ad adventum auroræ universa terræ facies exhilaratur: ægri, qui totâ nocte cum acerbis conflabantur doloribus, refocillantur, ac respirant; pecora & jumenta læta ad pascua se parant; artifex, villani & operarij ad labores se se accingunt: *Exibit homo ad opus suum*, Psal. 103. 23. & *ad operationem suam usque ad vesperum.* Verbo: ad adventum auroræ universa reviviscit natura. O Bone DEUS, tu es, qui fabricatus es auroram & solem; per auroram SS. Matrem tuam, sub tempus auroræ in lucem natam, & per Solem ejus Filium, tanquam Sponsum de thalamo Virgineo prodeuntem, agnoscimus, quid non sperare possumus sub patrocinio tantæ Matris, quæ *Nata, Patensque* fuit?

7. Nata est autem hæc SS. Virgo juxta S. Damascenum & plures S. Jo. Damasc. l. 4. de fide, c. 16. &c. alios Jerosolymis in domo Probatice Joachim & Annæ, hoc est, juxta celeberrimam illam Piscinam probaticam, *ubi jacebat multitudo magna languentium, cacorum, claudorum, aridorum, expestantium aque motum*; & quid, obsecro, hoc aliud præsignabat, quàm quòd mitissima illa Virgo & Mater DEI electa in hoc magno mundi Xenodochio futura esset

*s. Bernh.
Serm. B. M.
de Verb. A.
post. f. 53.*

esset exoptata salus infirmorum, refugium peccatorum, solatium afflictorum, & omnium languentium animarum securum asylum? sic non immeritò huic Mysticæ nostræ Piscinæ Probaticæ pro lemmate majoribus & aureis caracteribus inscribimus: **AFFLICTIS SPES UNICA REBUS.** O Christiani! ô miseri, ô languidi, imò & desperabundi respirate: *MARIA*, ait Doctor Mellifluus, *omnibus misericordiam aperit, ut de plenitudine ejus accipiant universi: captivus redemptionem, aeger curationem, tristis consolationem, peccator veniam, justus gratiam, Angelus letitiam, denique tota Trinitas gloriam, Filij Persona carnis humanæ substantiam, ut non sit, qui se abscondat à calore ejus.* Ah quid times anime mi, accedere ad hanc pientissimam Matrem tuam? Mater est, & sufficit.

*s. Ant in
hunc loc.
Jo. 5.
Ludolph.
Carth. p. 1.
c. 77.*

Nata autem fuit, prout dictum est, & quod bene observandum, juxta Piscinam Probaticam, quæ habebat quinque porticus, cujus aquæ semper rubebant ex cruore victimarum, quæ in eadem abluebantur Piscina, priusquam in ara DEO per ignem cremarentur. Hæc, inquam Piscina typus elegantissimus Dominicæ Passionis fuit; ita D. Antonius Paduanus. *Piscina est passio Christi, porticus quinque vulnera ejus; addit Ludolphus Carthusianus, in eadem piscina illud lignum tempore Christi Passionis esse inventum, ex quo Crux fabricata est, in qua salutis auctor pependit, & propriâ morte mortem omnium superavit; & juxta hanc Piscinam, observa, nata est in lucem Virgo illa intemerata & innocentissima, & quid hoc aliud præsignavit, quam quòd aliquando juxta Crucem, ubi vera illa gratiarum piscina pro salute mundi foret adaperienda, stare deberet, ut fidelis salutis nostræ advocata, & coadjutrix redemptionis, non quidem Redemptori nostro commoriendo, sed illi subministrando humanitatem, tanquam Divinitatis instrumentum, quo ipse redemptionem operaretur: Stabat autem juxta Crucem JESU Mater ejus &c.* O pientissima, quis non amet te?



CON.